

SAVOGNIN: Canorta Tgimirola

En de da rimmada per la canorta

pb. La Canorta Tgimirola per igls unfants da Surses duess neir daverta scu previa igl I. da matg 2015. Ins è sen buna veia e las labours preparativas marschan. En de impurtant è anc igls 7 da mars. Lez de vign rimmada roba da totta sorts per la canorta.

Igl december passo è la populaziun neida infurmada a Savognin sur dalla fundaziun dad ena canorta per unfants. Essend tgi dava gio ena canorta a Valbella, ins ò decidia da surpigliar las structuras dad ena organisaziun existenta e far a Savognin quasi ena filiala cun igl nom «Canorta Tgimirola». Gio lò ins ò comunitgia tgi l'avertura seia preveida per igl 1. da matg 2015. Davantor èn gio eidas las diversas labours da preparaaint: igls contracts cun igls possessours per igl local dalla canorta all'antieriora «Cantina» a Savognin, tschartger e pladeir igl personal da survigilaziun, sierar las finanzas, piglier ancunter las ampremas annunztgas, far ena pagina d'internet etc. Tenor Bettina Bergamin, tgi fò part alla suprastanza ins è sen buna veia.

Ins so duvrar quasi tot

Ena tgossa tgi vign considerada scu impuranta dallas responsablas è igl de da rimmada tgi è fixo per igls 7 da mars 2015. Chel ò li ainten la Canorta Tgimirola dallas 14.00 anfignen las 17.00. Schi pertge en de da rimmada? «Ainten ena canorta d'unfants ins so duvrar blera roba. Chegl son esser tarmagls da tottas sorts, roba per zamberger, mobiglia per unfants scu soptgas, tgarigns ed er vistgadeira», dei Bettina Bergamin. I so tgunsch capitär, tgi en unfant sveida or igl dabever sen sasez u patta igl da-



Ainten la Canorta Tgimirola a Savognin è igls 7 da mars dallas 14.00 anfignen las 17.00 igl de da rimmada.

magler sur las tgotschas. Alloura ins è adegna led dad aveir en bunga reserva da vistgadeira per midar.

Naturalmaintg peggia l'organisaziun dalla canorta er gugent ancunter contribuziuns finanziaras per saveir cumprar tgossas tgi èn da basigns.

Schi igl de da rimmada ò success, pò la Canorta Tgimirola gio darveir cun ena bunga infrastructura, uscheia tgi igls 10 unfants, tgi ins chintava dad aveir all'antschatta, pon aveir ena bunga dimora ed er betg lungurela.

Organisaziun professiunala

Per igl de da rimmada digls 7 da mars è nia surlaschea navot alla casualitat. Ins ò fatg schizont ena organisaziun professiunala. E chegl cun ena classa digl gimnasi da sport a Tavo. Schi scu chegl? Alexandra Ledermann è stada inizianta dalla canorta a Valbella. Ossa lavoura ella an incumbensa per l'organisaziun. Spezialmaintg an dumondas d'organisaziun, finanzas e dretg. Professiunalmaintg è ella scola lasta agl gimnasi da sport a Tavo. Cun igls sies students digl terz onn, ò ella lia far en project practic. Chel sa nomna «Avertura Canorta Tgimirola». Per part ansemen cun lour scolasta e per part sulets on igls scolars da Tavo organiso igl de da rimmada e pango ve da tot. Els on er creo e stampo en flyer tgi vo ainten tot las casadas da Surses. E tar lour pensums ò er tutgia da far ena formaziun parziale dalla pagina d'internet.

Cun lour lavour e chest project spezial vegian igls scolars rimno bungas experientschais e tiers chegl er già plascheir ve dalla tgossa. Digi reminiscent: la scola tgi igls scolars fon agl gimnasi da sport, èn ena scolaziun da quatter onns suandonta alla scola elementara manevla alla pratica ed alla fegn survignan igls absolvents en attestat da qualificaziun scu mercantils. La scolaziun pratica è per gronda part integrada ainten l'instrucziun.



Ena part dalla classa agl gimnasi da sport a Tavo, tgi ò gido organisar igl de da rimmada ed ò er creo igl flyer tgi è ia ainten tot las casadas da Surses.